

Na osnovu člana IV. 4. c) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma održanoj 27.marta 2001.godine i na sjednici Doma naroda održanoj 30.marta 2001.godine, usvojila je

ZAKON

O IZVRŠENJU BUDŽETA INSTITUCIJA BOSNE I HERCEGOVINE I MEĐUNARODNIH OBAVEZA BOSNE I HERCEGOVINE ZA 2001.GODINU

Član 1.

Ovaj zakon utvrđuje način izvršenja Budžeta institucija Bosne i Hercegovine i međunarodnih obaveza Bosne i Hercegovine za 2001.godinu (u nastavku teksta: Budžet).

Član 2.

Svi zakoni koji se odnose na Budžet moraju biti u saglasnosti sa ovim zakonom.

Ovaj zakon će se provoditi u strogoj saglasnosti sa Zakonom o vanjskom dugu Bosne i Hercegovine i Zakonom o trezoru institucija Bosne i Hercegovine.

Član 3.

Korisnici budžetskih sredstava su: Parlamentarna skupština Bosne i Hercegovine, Predsjedništvo Bosne i Hercegovine, Ustavni sud Bosne i Hercegovine, Ured za reviziju finansijskog poslovanja institucija Bosne i Hercegovine, Vijeće ministara Bosne i Hercegovine, Službe Vijeća ministara Bosne i Hercegovine, Služba za zajedničke poslove institucija Bosne i Hercegovine, Ministarstvo vanjskih poslova, Ministarstvo civilnih poslova i komunikacija, Ministarstvo vanjske trgovine i ekonomskih odnosa, Ministarstvo za evropske integracije, Ministarstvo za trezor institucija Bosne i Hercegovine, Ministarstvo za ljudska prava i izbjeglice, Državna granična služba, Odjeljenje civilne avijacije, Agencija za statistiku, Komisija za imovinske zahtjeve, Dom za ljudska prava, Ured ombudsmena za ljudska prava, Centralna komisija za obilježavanje državne granice, Regulativna agencija za telekomunikacije, Agencija za promociju inostarnih ulaganja u BiH, Komisija za reviziju statusa naturalizovanih osoba.

Finansiranje komisija, odnosno agencija koje nemaju status pravnog lica, a koji su ustanovljeni posebnim odlukama Predsjedništva BiH i Vijeća ministara, obezbjeđuje se transferima preko i unutar resornih ministarstava koja prate rad ili koriste njihove usluge.

Za ostale institucije čije je osnivanje u toku ili će se osnovati u toku 2001. godine rezervišu se sredstva na poziciji 23. (Ostale institucije) i poziciji 24. (Budžetska rezerva) Budžeta institucija Bosne i Hercegovine i međunarodnih obaveza Bosne i Hercegovine za 2001. godinu.

Član 4.

Prihodi Budžeta su:

- a) transferi sredstava iz budžeta entiteta, u skladu s utvrđenim propisima za takve transfere;
- b) administrativne takse, u skladu sa Zakonom o administrativnim taksama;
- c) vanredni prihodi-donacije.

Član 5.

Rashodi Budžeta obuhvaćaju:

- a) troškove (vrste troškova navedenih u Budžetu);
- b) investicije;
- c) posebne troškove (koji uključuju kotizacije za međunarodne organizacije, kotizacije za učešće na međunarodnim savjetovanjima i drugo);
- d) servisiranje vanjskog duga;
- e) tekuća rezerva;
- f) ostale obaveze.

Član 6.

Korisnici Budžeta mogu koristiti sredstva iz Budžeta samo u svrhe određene Budžetom. Sredstva Budžeta se koriste u skladu sa finansijskim godišnjim planovima korisnika, i na način utvrđen mjesečnim finansijskim planom. Korisnici Budžeta su dužni da usklade izvršenje svojih obaveza sa utvrđenom dinamikom priliva i odliva sredstava.

Član 7.

Korisnici sredstava Budžeta su obavezni da podnesu Ministarstvu za trezor institucija Bosne i Hercegovine (u nastavku teksta: Ministarstvo za trezor) svoje mjesečne finansijske planove za izvršenje Budžeta 10 dana prije početka svakog mjeseca.

Ako korisnik ne podnese mjesečni finansijski plan Ministarstvu za trezor u datom roku, mjesečni finansijski plan za tog korisnika određuje Ministarstvo za trezor na osnovu finansijskog plana prethodnog mjeseca.

Član 8.

Korisnici su obavezni da Ministarstvu za trezor podnesu tromjesečni izvještaj o upotrebi sredstava Budžeta u roku od 15 dana po isteku svakog tromjesečja.

Član 9.

Iznosi rashoda određeni Budžetom za 2001. godinu, sa izuzetkom iznosa određenih za servisiranje vanjskog duga Bosne i Hercegovine, smatraju se maksimalnim iznosom.

Član 10.

Ministarstvo za trezor sačinjava mjesečne planove prihoda i rashoda, uzimajući u obzir dinamiku priliva i odliva sredstava. Kada prilivi sredstava nisu u skladu sa mjesečnim planom rashoda, Ministarstvo za trezor će uskladiti dinamiku korištenja sredstava prema ostvarenoj dinamici priliva budžetskih sredstava. Izuzetno, Vijeće ministara može, na prijedlog Ministarstva za trezor, odlučiti drugačije.

Član 11.

Ministarstvo za trezor prenosi neutrošena sredstva, preko posebnih stavki rashoda, iz mjesečnog finansijskog plana za izvršenje Budžeta, na iste stavke u planu za izvršenje Budžeta za naredni period, a unutar iste budžetske godine.

Izuzetno, ako tokom budžetske godine korisnik Budžeta ocijeni da je u okviru Budžetom predviđenih materijalnih troškova, potrebno izvršiti korekciju strukture troškova, podnosi zahtjev Ministarstvu za trezor institucija Bosne i Hercegovine.

Zahtjev korisnika Budžeta iz prethodnog stava Ministarstvo za trezor razmatra i o tome daje mišljenje.

Član 12.

Budžetom su predviđena i sredstva tekuće rezerve u iznosu od 1.076.080 KM.

O upotrebi budžetske rezerve odlučuje Vijeće ministara, po pribavljenom mišljenju Ministarstva za trezor. Sredstva rezerve koriste se za nedovoljno predviđene rashode korisnika Budžeta, za povećani obim poslova korisnika Budžeta, za finansiranje novih korisnika Budžeta i za ostale namjene, a za koje Vijeće ministara donosi odluke. Ako se tokom godine smanji obim odgovornosti korisnika ili se korisnik ukine, neutrošena sredstva po ovom osnovu se prenose u rezervu Budžeta, ili nekom drugom korisniku, odlukom Vijeća ministara, a na prijedlog Ministarstva za trezor.

Član 13.

Sredstva za ostale obaveze namijenjene su i za isplatu naknada za zaposlene i poslanike kojiće ostati neraspoređeni u skadu sa uredbama o plaćama zaposlenih.

Član 14.

Korisnici su dužni da Ministarstvu za trezor podnesu rješenje o zasnivanju i prestanku radnog odnosa svih zaposlenih koji se finansiraju iz Budžeta.

Ovo rješenje treba dostaviti najkasnije osam dana od zasnivanja ili prestanka radnog odnosa.

Član 15.

Vijeće ministaraće svojim aktom svaka tri mjeseca utvrđivati osnovicu za obračun plaća zaposlenih u institucijama Bosne i Hercegovine, a po pribavljenom mišljenju Ministarstva za trezor o visini potrebnih sredstava za svako povećanje.

Član 16.

Korisnici budžeta su obavezni za sve nabavke stalnih sredstava, materijala i uslugačija vrijednost za godišnje potrebe prelazi 10.000 KM provesti proceduru javnog oglašavanja i izbora najpovoljnijeg ponuđača.

Ministarstvo za trezorće u saradnji sa drugim budžetskim korisnicima definisati registar materijala i usluga koje podliježu odredbama stava I. ovogčlana.

Član 17.

Budžet i sve transakcije Budžeta i budžetskih korisnika vršitće se u ovoj godini u konvertibilnim markama, izuzev za servisiranje vanjskog duga.

Član 18.

Radi osiguravanja priliva sredstava u Budžetu, u skadu sa preuzetim obvezama za izmirenje vanjskog duga u 2001. godini, budžeti entiteta će uspostaviti automatizam kojimaće garantovati priliv sredstava u Budžet prema utvrđenoj dinamici i visini potrebnih sredstava za izmirenje vanjskih dugovanja u 2001. godini.

Član 19.

Nadzor nad prilivom sredstava, finansijskim i materijalno-računovodstvenim poslovima korisnika Budžeta, te zakonitom i svrsishodnom upotrebom budžetskih sredstava, vrši Ministarstvo za trezor.

Odgovorno lice, rukovodilac i korisnik Budžeta su odgovorni za računovodstvo i unutarnji nadzor transakcija prihoda i rashoda ministarstava i drugih budžetskih korisnika koji spadaju u njihovu djelatnost.

Član 20.

Korisnici Budžeta dužni su ovlaštenim radnicima Ministarstva za trezor omogućiti obavljanje kontrole i dati sve potrebne podatke, isprave i izvještaje koja se odnose na pregled. Ovlašteni radnici dužni su prilikom vršenja kontrole čuvati tajnost pregledane dokumentacije.

Član 21.

Ako ovlašteni radnik prilikom obavljanja budžetskog pregleda utvrdi da je povrijeđen zakon, drugi propis ili akt, rješenjem nalaže uklanjanje utvrđenih nepravilnosti u određenom roku.

Ako ovlašteni radnik utvrdi da počinjene nepravilnosti imaju obilježja privrednog prestupa ili prekršaja, obavještava ministra za trezor institucija Bosne i Hercegovine, koji bez odlaganja obavještava Generalnog revizora finansijskog poslovanja institucija Bosne i Hercegovine.

Član 22.

Ministarstvo za trezor institucija Bosne i Hercegovine odgovorno je za permanentnu kontrolu praćenja izvršenja Budžeta u skladu sa Zakonom o trezoru i propisanim procedurama kojima se reguliše trezorsko poslovanje.

Član 23.

Ministarstvo za trezor dužno je da usaglasi procedure interne revizije budžetskih prihoda i rashoda sa procedurama koje donosi Generalni revizor finansijskog poslovanja institucija Bosne i Hercegovine.

Član 24.

O obavljenoj kontroli, zaključcima i odlukama u smislu čl. 20. do 24. ovog zakona Ministarstvo za trezor izvještava Vijeće ministara.

Član 25.

Ministarstvo za trezor donosi Pravilnik o knjigovodstvu, te sadržaju i načinu finansijskog izvještavanja za sva ministarstva i budžetske korisnike.

Član 26.

Sva sredstva koja do 31. decembra preostanu na računu nekog ministarstva ili budžetskog korisnika moraju se vratiti na račun Budžeta.

Član 27.

Vijeće ministara je obavezan uputiti Predsjedništvu Bosne i Hercegovine i Uredu za reviziju finansijskog poslovanja institucija Bosne i Hercegovine izvještaj o izvršenju Budžeta za prethodnu godinu najkasnije do 30. marta tekuće godine.

Predsjedništvo Bosne i Hercegovine je obavezno obavijestiti Parlamentarnu skupštinu Bosne i Hercegovine o izvršenju Budžeta za prethodnu godinu najkasnije do 30. aprila tekuće godine.

Član 28.

Sadržaj izvještaja iz člana 27. ovog zakona mora biti u skladu sa klasifikacijama računa, a sadrži:

- a) ostvarene prihode u toku godine;
- b) izvršene rashode po korisnicima u toku godine;
- c) početno i završno stanje računa Budžeta;
- d) objašnjenje odstupanja;
- e) podatke o svim zaduživanjima i upravljanju dugom;
- f) podatke o korištenju budžetske rezerve.

Član 29.

Prije podnošenja godišnjeg izvještaja o izvršenju Budžeta Predsjedništvu Bosne i Hercegovine, Vijeće ministara je dužno formirati komisiju koja će izvršiti pregled prihoda i rashoda Budžeta.

Član 30.

Na prijedlog Ministarstva za trezor ili korisnika Budžeta, Vijeće ministara može donijeti odluku o izmjeni i dopuni Budžeta, nakon tri mjeseca od usvajanja Budžeta i provesti odgovarajući postupak.

Član 31.

Za odgovorna lica koja ne postupaju po odredbama ovog zakona primjenjivat će se postupci za utvrđivanje disciplinske, prekršajne i krivične odgovornosti:

1. ako ne koriste sredstva Budžeta u svrhe u koje su namijenjena i ako lice preuzima obavezu koja je veća od iznosa utvrđenog u Budžetu;
2. ako ne podnesu mjesečni finansijski plan Ministarstvu za trezor, ili ako lice ne dostavi blagovremeno taj plan;
3. ako ne dostave tromjesečno izvještaj Ministarstvu za trezor, ili ako lice ne dostavi blagovremeno taj izvještaj;
4. ako ne dostave Ministarstvu za trezor potvrdu sa naznakom početka i prestanka rada zaposlenih koji se finansiraju iz Budžeta;
5. ako ne vrše obavezu isplate plaća i drugih materijalnih prava u skladu sa odlukom Vijeća ministara;
6. ako vrše nabavke i zaključuju ugovore u iznosu iznad 10.000 KM, bez javnog konkursa i propisanog postupka;
7. ako ne osiguravaju uslove za izvršenje nesmetanog nadzora nad finansijskim i materijalno-računovodstvenim poslovima korisnika Budžeta.

Član 32.

Ovaj zakon stupa na snagu danom objavljivanja u “Službenom glasniku BiH“, a primjenjivat će se od 01.januara 2001.godine. Zakon će se objaviti i u službenim glasilima entiteta.

PS BiH broj 4/01 30. marta 2001.godine Sarajevo

Predsjedavajući Doma naroda Parlamentarne skupštine BiH mr.Ilija Ćimić, s. r.

Predsjedavajući Predstavničkog doma Parlamentarne skupštine BiH dr.Sead Avdić, s. r.